

Hayando bon comentario tanto na Hulanda como na Aruba

Millycent Ras ta na Aruba pa promocion di su cancion nobo “Laganan”



ORANJESTAD - Millycent Melody Ras a nace dia 6 di augustus 1981. Naci den cuna di cantante y musiconan di Savaneta, Ismael y Grecia Ras, a biba parti di su hubentud na San Nicolas y despues na Savaneta y awor na Friesland Hulanda.

For di un edad masha chikito (4 aña) e la demostra cu e tin e pasion pa canta, composita, actua y baila. Na scolnan e la yega di actua y canta pa diferente ocasionnan como nochi pa mayornan. E ta comparti e don cu e la nace cun'e, yudando boluntar-

iamente Chaz Models como maestra di canto. E tabata e cantante principal di The Hot Ones Band y a canta den diferente hotel, casino y tambe durante diferente actividadnan manera Cas di Glas, Carnaval y a participa na Un Canto pa Aruba pa 18 di Maart.

Su pasion pa crea musica y como hobby el a cuminsa cu un studio chikito na cas y el a yama esaki No Limit Studio, na unda atardi, durante fin di siman e ta yuda boluntariamente hobennan di poco recurso graba y traha nan musica den su propio studio. Cariñosamente yama como

Milly, el a dicidi di bay biba na Hulanda. Na Hulanda el a graba cu Ir-Sais Studios na Rotterdam. Riba e mesun dia e la shoot e video clip y a bolbe bek atardi Friesland. E cantica ta refleha problemanan cu tin hopi biaha aki na Aruba ora cu un persona ta den un relacion. “Laganan”, sigui papia..... E cancion ta den e genero zouk.

Na su cas na Friesland e tin su propio studio na unda e la composita y aregla un jingle pa un politico renombra aki na Aruba, cual ta zonando den e dianan aki na varios radio.

Milly ta studiando music producer riba su propio farsa economico y lo caba pronto pa asina sigui master den audiovisual. Algo cu e ta haci cu hopi amor. E proposito di su estudio ta pa e por eherce su carera aki na Aruba, pero tambe cu e por sigui aporta e pasion di yuda hubentud lo maximo posibel.

Milly ta na Aruba actualmente y e mes por a ripara cu e single a coy acogida cerca e publico. Una bes cu Milly yega Friesland, e lo bay cuminsa cu su album completo, entre otro bachata, diferente otro ritmo e idioma cu e lo bay canta.

Despues di esey, e lo bin Aruba bek y lo sigui pa Corsou y Boneiro pa promove su CD nobo. Pa Milly trahando cu Ir-Sais, e ta saca cancionnan mas di su curason compara cu otro hende cu el a traha cu nan. E palabranan cu ta wordo uza ta real y tambe e manera cu e productor ta traha ta cu amor y cu hendenan asina Milly ta cuminsa traha.

Tur esnan cu kier tin un parti di Milly den nan cas, por pasa libremente na Amigoe, puntra pa Grecia Ras. E CD ta sin costo y ta haciendo esaki pa Aruba. □